

Balua u aye e pi omaEbele Eli na kalanu

Balua inde u aye nani e pi omaEbele, u aye nani pi limbi omakilisito inde akolo masikpe de na'o ka nabhuka gba o bhú Kilisito ka nato mbolo li uo adu anu bha ne kalanu-o. Kpála inde aye balua ango-o, adu ato masi bhú uo ane mane bhú nabhuka ne nasuno pi uo me, Yesu Kilisito ne polofeta na kukulu, a ko la di polofeta na soso inde li Ebhe apana lie bhú e pi okpála gba e-o.

Bhú 'ngú na Ebhe gba omaYuda-a, odimandø adu amene mayo ne natsulu onu ngubula me Ebhe mbu li siti 'ngú gba okpála. Engú inde u adu amene bhomu-o, adu kulu Yesu inde Ndili na duduma gba Ebhe, inde aha lie ngae makpe maka enu inde natsulu matsulu. Kaka-a, Ebhe a'o ani ngbéngbé ane opolofeta, ane oandjelu, ane Moidje ngae makpe, Ebhe atsia pa me a ko dimandø na duduma. Li pápá gba ani-e, ndu omabhuka hana asia mukobho li tsulu u adu ne e li pápá na siti 'ngú gba o ne li pápá na kuo.

Ongbengbe ongú inde bhú bhuku inde-e ngae inde:

Eli na kalanu: Ebhe ngasuno li e mbámbá bhú

Kilisito 1:1-3

Kilisito ngbéngbé ane opolofeta, ane oandjelu,
ane Moidje, ane Djodjue, ane odimandø, ane
gandja a la di-e makiso 1:4 - 10:39

Engú na ngbéngbé a ko nabhuka 11:1 - 12:29

Nanga li Ebhe 13:1-19

Mayo na soso 13:20-21
Eli na soso 13:22-25

Yesu Kilisito ne Ndili gba Ebhe makpe

¹ Nani kalanu-o, Ebhe akpokpo 'ngú pi onguo ogbi ní bhutsibhutsi di ne li okpadji bhelé bhú 'li opolofeta . ² La bhú oekpí na soso inde-e, aní akpokpo 'ngú pi ní bhú 'li Ndili gba e inde aní a'o e ngámá pí 'ndji ndu 'he hana, di u abho nani ndu 'he hana bhú dabili bini ne e-o. ³ Aní aha bha 'Dyi e hana, kaka-a, kpála bhende au sangu gba Ndili-e au bhomu-o sangu gba Ebhe makpe. Aní abi ndu 'he hana ne 'li e na angu-o. Pita aní agbegbe okpála lie bhú siti 'ngú gba o-o, aní atsia atapa abhúlá ngú nadu li bili na ngámá li pá 'kpa na kokpa gba Ebhe Angbamili.

Ndili gba Ebhe-e ane oandjelu mane

⁴ Ndili gba Ebhe-e ane oandjelu mane, kaka Ebhe agisila 'ili li aní inde ane bhende gba u-o mane.

⁵ Padhá de, anga Ebhe pa nga pi andjelu bini de me:

«Ngamu-o, mu ne Ndili gba ma,
naki inde-e, ma asuno 'ngú angu-o
mbámá.» †

Ani pa di li 'ngú gba andjelu bini de me:

«Ma adú ne 'dyi aní,
aní tsia dú ne Ndili gba ma-o.»†

⁶ Li nedhinga li Ebhe adu natima gina Ndili gba e lie píla doto-o, aní apa me:

† 1:5 1:5 Tsia bhú Ets. 2:7. † 1:5 1:5 Tsia bhú 2 Sam. 7:14.

«A ayo me ndu oandjelu gba ma-a hana dhogò
ani.†»

7 Ani atsia apa li 'ngú gba oandjelu-o me:

«Oandjelu gba ma-a ngamene kulu muma maka
anvi,

u ngateteke ma maka djua inde ngatsi
matsi.†»

8 La-a, ani atsia apa li 'ngú gba Ndili-e me:

«Mu ne Ebhe! Nau gba mu-o adú duduma ne
duduma.

Mu ngau pí 'ndji okpála gba mu-o ne ngbili
'ngú .

9 Mu kunda ngbili 'ngú, mo oyala engú na sisiti.

Kaka-a, Ebhe gba mu-o, a'o mu kpi pi e,
ani abhu mu bhú ká obi mu,
ani atsia atuko emu na djali pí 'ndji mu.†»

10 Ebhe atsia apa matá me:

«Ngámá, mo obho doto nayie li lilita ngamu,
kokpí ne nganda 'kpa mu.

11 Ndu 'ngú bhomu-o hana angíta mangíta, la
ngamu-o,

mo otígala matigala.

Ndundu hana akádha maka bongo .

12 Mo onunu uo maka u anunu koti lie,
u tsia yípa di maka li bongo ayiyipa lie.

La ngamu-o, mu yiyipa de, kalanga gba mu-o
ndjía la di-i de.†»

13 Ebhe pa nga belegu pi andjelu bini de me:

«Ngamu-o, go du kuto li pa 'kpa ma na
kokpa,

† 1:6 1:6 Tsia bhú Det. 32:43. † 1:7 1:7 Tsia bhú Ets. 104:4.

† 1:9 1:9 Tsia bhú Ets. 45:7-8. † 1:12 1:12 Tsia bhú Ets. 102:26,
28.

ma abú obhulú yala gba mụ-o

dabili na sa 'dhu mụ.†»

14 Oandjelu bha ne obua inde ngamene kulu pi Ebhe. Aní ngatima uo me u nụ nateteke okpála inde ayo me u sia mukobho-o.

2

Mukobho inde u akpokpo 'ngú na e-e, a ko kukulú mukobho

¹ Kaka-a, a ayo me ní gbite liní kpekpeke li kukulú 'ngú inde ní adje e-o, amba ní ambú li kpadji-e de. ² Engú inde li Ebhe akpokpo e bhú 'li oandjelu-o , asuno lie me a ko kukulú 'ngú. Okpála bhende i lila eli ango-o de-e, inde agumú líli-e, u asia ke 'ngú inde ati ne uo-o. ³ La nganí-e, ní ti da naneke ke 'ngú-o lele pi, i dū me ní nde 'o 'to ní 'to kukulú mukobho-o de-e? Ngámá ngae makpe akpokpo 'ngú na mukobho ango-o kalanu ngae. Pipita-a, okpála bhende adje-e atsia apa pi ní me a ko kukulú 'ngú. ⁴ Abhomu-o, Ebhe atsia asuno me engú u akpokpo e-e, a ko kukulú 'ngú ne ongú na ngangamba, di ne ndu okiaka 'ngú hana. Ebhe apana ongú ango-o bhú naha Bu Bhobua maka aní akunda lie-o.

Yesu akpi ngubula nakobho ndu okpála hana

⁵ Ebhe ha angu pi oandjelu ngú nako pí doto inde ngago ya ngakpokpo 'ngú na e inde-e de.

⁶ Engú bini, bhú Bhuku gba Ebhe-e , kpála bini apa me:

«Kpála-kuti ne da, ngubula me mụ bhundja engú gba aní-e?

† 1:13 1:13 Tsia bhú Ets. 110:1.

Ndili gba kpála-kuti ne da me mo 'o 'to mu
'to ani-e?

7 Mo o'o nani ani sa oandjelu ngubula nedhinga
bedi.

Mo otsia ato ndata na asasaua ne mazima
bhú 'ndji ani.

8 Mo otsia a'o ndu 'he hana sa ani.†»

Ebhe a'o nani kpála-kuti ngámá pí 'ndji ndu 'he
hana. A kunda napa me, ani 'o nani ehe bini de
me aneke nadu sa ani-e de. La mbia inde-e, ní
u de me kpála ne ngámá pí 'ndji ndu 'he hana-
a de.† 9 Engú bini, ní ngau me Yesu adu nani sa
oandjelu ngubula nedhinga bedi, amba ka bádha
bhú 'bu gba Ebhe-e , ani ti da nakpi pi ndu okpála
hana. Ní ngau mbia inde-e me, ani adyi ndata na
asasaua ne mazima, anga ani asia nani likabhu
bhú nakpi ka e. 10 Padhá de, anga Ebhe abho ndu
'he hana ngae, ndu 'he hana la di ne naani. Ani
akunda me ongisi gba ni-e bhelé sia di sangu gba
ni-o. I nde lie me Yesu Kilisito ngasuno kpadji na
makobho pi uo ngae, a ayo nani me ani du bedhe
hana li kpadji nazu likabhu.

11 Yesu ngagbegbe okpála bhú siti 'ngú gba o-
o ngae. La di-e, 'dyi ndu okpála hana inde ani
agbegbe o bhú siti 'ngú-o bha bini. Kaka-a, numu
li ani ade ngú na'i uo me ondaise ni. 12 Ani apa
pi Ebhe me:

«Ho Ebhe! Ma apá engú gba mu-o pi ondaise ma.

Ma atóko mu kala ndu okpála hana.†»

13 Ani apa di me:

† 2:8 2:8 Tsia bhú Ets. 8:5-7. † 2:8 2:8 Tsia bhú Ets. 8:5-7.

† 2:12 2:12 Tsia bhú Ets. 22:23.

«Ma a'ó nabhuka gba ma-a bhú Ebhe†.»

La di me:

«Tsia ya bhú dabili bini ne ongisi inde li Ebhe aha o muma-o.†»

¹⁴ La di-e, ongisi gba Ebhe-e, a ko okpála-kuti inde bhú kute, a la di bhú uo ne ngute. Yesu ngae makpe akolo bhadi maka uo, ani asia di kute ne ngute maka uo. Abhomu-o, bhú nakpi ka ani-e, ani atsia aha angu djabulu inde li angu na kuo nde ka e-o. ¹⁵ Yesu amene di mo-o ngubula nakobho okpála inde akolo maka obalise gba kuo bhú mukobho gba o libhomu. ¹⁶ Padhá de, anga a na paká me ani go nani nateteke oandjelu de. Engú bini, ani ago mangbo ngú nateteke piga gba Abalahama. ¹⁷ Kaka-a, a ayo nani me ani kolo bhú ndu 'ngú hana maka ondaise e, amba ani du 'ngbé dimandø . A ayo nani me ani kolo 'ngbé dimandø inde abedhe ne ndjinga, inde di ngamene kulu gba Ebhe-e li lelele, ngubula mambu na siti 'ngú gba okpála-o. ¹⁸ Mbia inde-e, ani ti da nateteke okpála inde ngali bhú nale-o, anga ngaani makpe-e, ani apu bhú nale, ani atsia azu di likabhu.

3

Yesu ane Moidje mane

¹ Kaka-a, ondaise ma omakilisito, ngayi okpála inde li Ebhe a'i o-o, yi 'o mabhundja gba yi-e pí Yesu. Padhá de, anga Ebhe atima ani ngubula me ani du bhulu titima di ne 'ngbé dimandø gba ní-o, ní atsia abhuka la bhadi ka ani. ² Ani

† 2:13 2:13 Tsia bhú isa. 8:17. † 2:13 2:13 Tsia bhú isa. 8:18.

amene kulu kala Ebhe inde abhũ ani ngú kulu ango-o ndjindji. Ani amene kulu ango-o li lelele maka li Moidje amene nani lie bhú Piga gba Ebhe-e libhomu-o.† ³ Kpála inde ayiki eti-e, sisia nadhøgø nane eti inde ani ayiki e-o. A moko, a ayo me u dhøgø Yesu nane Moidje mane. ⁴ Ayiyiki eti hana ne kpála bini. La-a, kpála inde abho ndũ 'he hana-a ne Ebhe. ⁵ Moidje ngae makpe amene nani kulu li lelele bhú Piga gba Ebhe-e libhomu. Ani adũ nani kpála na kulu inde adũ nakpokpo 'ngú li Ebhe adũ nakũnda napa e sidi-o. ⁶ Engú bini, Kilisito ne Ndili inde ngamene kulu li lelele. Ani maka nepanda li Ebhe a'o e li eti gba e-o. Eti ango-o, a ko ní, i dũ me ní nde abhuka na paká paká, i dũ la di me ní nde ne gindaginda li 'ngú ní nga'o 'to ní 'to e-o.

Bili naguo inde li Ebhe aleke e pi okpála inde ngamanga ani-o

- ⁷ Kaka-a, a maka li Bu Bhobua apa lie me:
«I dũ me yi nde adje 'li Ebhe naki inde-e,
⁸ yi agbíte bua yi de,
maka yi agbe nani kpéke 'ndji lie li ani,
ekpí inde yi ale ani lie abhú mili bili-o.
- ⁹ Bhú 'gũ oo, onguo ogbi yi ale nani ma ngũbula nambila 'ndjá bua gba ma-o,
abana u au ndũ 'ngú ma amene e, ngũbula kalanga ndjikpa badha lie hana-o.
- ¹⁰ Kaka-a, bua ma atsia ake ne uo.
Abhomũ-o, ma atsia apa me:

† 3:2 3:2 Tsia bhú Nom. 12:7.

«Uo ngadji 'ngbu o li ma ndu nedhinga hana bhú mabhundja gba o.

U mbila engú inde ma akunda e pi uo-o belegu de bini.»

¹¹ Li bua ma ake lie, ma atsia atu silika me:

«U lí li bili ma aleke e ngú naguo pi uo-o belegu de bini!†»

¹² Ondaise ma, yi lila liyi ngubula me kpála bini bhú ká yi adú ne siti bua de. Aní adú di ne bua na nabhuka de-e de, inde nga'e okpála li kpadji gba Ebhe na mukobho-o. ¹³ Aní nga'i yi ndu 'kpí hana. Ka 'ngú ango-o, li ekpí na naki inde li Bhuku ngapa 'ngú e nde nga bha ngabhue lie, yi teteke liyi sunda yi nedhinga yi ngadje e'i ango-o lie-o. I du mo-o, siti 'ngú píte yi de, kpála bini bhú ka yi yála la di namanga Ebhe de. ¹⁴ Padhá de, anga ní ne okpála gba Kilisito, i du me ní nde alila nabhuka inde ní asia nani e li lilita kpekpeke akolo ali soso-o.

¹⁵ Bhuku gba Ebhe-e apa me:

«I du me yi nde adje 'li Ebhe naki inde-e, yi agbíte bua yi de, maka yi agbe nani kpéke 'ndji lie li ani-o.†»

¹⁶ La-a, a ko okpála bhedho inde adje 'li Ebhe, atsia agbe nani kpéke 'ndji li ani-e? A ko ndu okpála hana inde li Moidje agbe o bhú Edjipeto-o.

¹⁷ La-a, Ebhe ake 'ngú lie pi oda ngubula kalanga ndjikpa badha-a? Aní ake 'ngú lie pi okpála inde amene siti 'ngú, u atsia amu abhú 'gu. ¹⁸ Ebhe atu nani silika me: «U lí li bili ma aleke e ngú

† **3:11** 3:7-11 Tsia bhú Ets. 95:7-11. † **3:15** 3:15 Tsia bhú Ets. 95:7-8.

naguo pi uo-o belegu de bini.†» Ani atɔ nani pi oda? Ani atɔ pi okpála inde agbe nani kpéke 'ndji li ani-o. ¹⁹ Ní au me, u li nani li bili naguo bhomu-o de, anga u bhuka nani-i de.

4

¹ Ebhe apa nani me ní alí li bili naguo inde ni aleke e mali. Kaka-a, 'e-e! Yi lila liyi, amba kpála bini bhú ka yi anéke nali li bili ango-o de. ² Ní asia eli gba Ebhe-e bhadi maka okpála bhende adu nani abhu 'gu-o. La-a, u sia eli ango-o ne tata de. Padhá de, anga li u adje eli ango-o lie, u sia ne nabhuka de. ³ Nganí okpála bhende abhuka-a, ní alí li bili naguo bhomu-o mali, li Ebhe apa 'ngú e me:

«Li bua ma ake lie,

ma atsia atɔ silika me:

«U lí li bili inde ma aleke e

pi uo ngú naguo belegu de bini!†»

Abhomu-o, kulu gba ni-e atsia andjia nayie li ani abho doto lie-o. ⁴ Padhá de, anga bhú Bhuku gba Ebhe-e , u apa pindji ekpí na mananika-a me: «Ebhe aguo bhú 'kpí na mananika, li ani amene ndu kulu gba e lie hana-o.†» ⁵ Ebhe atsia apa matá di me: «U lí li bili inde ma aleke e pi uo ngú naguo belegu de bini.†»

⁶ Okpála bhende asia nani Bádha Ngali gba Ebhe-e kalanu-o, li nani li bili naguo ango-o de. Padhá de, anga u ayala nani namene líli gba

† **3:18** 3:18 Tsia bhú Nom. 14:1-35; di ne bhú Ets. 95:11. † **4:3** 4:3 Tsia bhú Ets. 95:11. † **4:4** 4:4 Tsia bhú Dje. 2:2. † **4:5** 4:5 Tsia bhú Ets. 95:11.

Ebhe. Abhomu-o, Ebhe atsia ade kpadji pi okpála koko ngú nali li bili angoo. ⁷ Kaka-a, Ebhe a'o matá ekpí koko, ekpí inde u a'i e me: «Naki inde.» Aní apa nani engú na ekpí angoo sidi naali bhú 'li Davidi, bhú lukuluku inde u apa 'ngú li e kalanu-o me:

«† du me yi nde adje 'li Ebhe naki inde-e,
yi agbíte bua yi de.†»

⁸ Padhá de, anga i dú me Djodjue dhúku nani ne okpála li bili naguo angoo, Ebhe de pa matá 'ngú na 'kpí koko naguo de. ⁹ Kaka-a, naguo maka ekpí naguo na mananika-a, atigala pi okpála gba Ebhe-o. ¹⁰ Padhá de, anga kpála bhende ali li bili naguo inde li Ebhe aleke e, ngaguo li okulu gba e maka li Ebhe aguo lie li obhe gba e-o. ¹¹ Kaka-a, ní mene ne kpéke me ní li li bili naguo angoo. Ní mene me kpála bini bhú ká ní atí ka kpéke 'ndji de maka onguo ogbi ní inde adu nani ne kpéke 'ndji-e, li lie li bili angoo de-o.

¹² Padhá de, anga eli gba Ebhe-e bhú mukobho, a la di ne angu. A dhédhé ane mbotia inde u adyi 'te e ne pasu bhisi hana. A adudu kpála, i tsia kólo makolo li bhobua ani. A ngadu kpála akólo makolo li bili li biki di ne mbilika aké lio lie-o. Eli angoo ngasuno engú inde awo lie li bua kpála ne bhende ani ngabhundja e-o. ¹³ Ehe bini nabho mabho inde awo lie kala Ebhe-e ade. Ndu 'he hana inde ani abho e ngau lie mbámbá kala ani. La di-e, ní akpókpo ndu 'ngú gba ní-e hana kala ani.

† 4:7 4:7 Tsia bhú Ets. 95:7-8.

Yesu ne 'ngbé dimandø gba Ebhe

¹⁴ Kaka-a, ní lù kpekpeke bhú nabhuka inde ní ngakpokpo 'ngú na e-o. Padhá de, anga a ka ní ne 'ngbé dimandø na angu inde anu akolo makolo abhúlá kala Ebhe. A ko Yesu, Ndili gba Ebhe. ¹⁵ 'Ngbé dimandø gba ní-e ne angu ngú nadjé líkabhu bhú dabilí bini ne ní bhú bhukú gba ní-o. Aní alí bhú nale ne ndu kpadji hana maka ní, engú bini, ngaani-e, aní mene siti 'ngú belegu de bini. ¹⁶ Kaka-a, ní dyudyo liní de kiti na ngámá gba Ebhe-o, lí bilí na bádha bhú 'bu gba aní-o. Oo, ní asía mambu, aní tsia súno bádha bhú 'bu gba e pí ní ngubula nateteke ní bhú nedhinga ayo lie-o.

5

¹ U bhubhu 'ngbé dimandø gba Ebhe-e bhú ká okpála ngubula me aní mene kulu gba Ebhe-e bhú ka uo. Aní tsutsulu enu maka makiso pí Ebhe ngubula siti 'ngú gba uo-o. ² 'Ngbé dimandø gba Ebhe-e ngae makpe di bhubhuku. Kaka-a, aní tí da nadjé ndjinga okpála inde lí imbilangu nde bhú 'ndji o ade, inde di ambu lí kpadji-o. ³ Lí 'ngbé dimandø gba Ebhe-e ngae makpe nde lie bhubhuku-o, aní tsutsulu enu na makiso pí Ebhe bha bini ngubula siti 'ngú gba okpála de. Engú bini, aní tsutsulu di ngubula siti 'ngú gba e makpe. ⁴ Kpála bini tí da nato ndata na 'ngbé dimandø gba Ebhe-e bhú 'ndji e ngae makpe de. Kpála kokolo bha 'ngbé dimandø gba Ebhe-e me Ebhe nde a'i aní ngae, maka aní a'i nani Alona lie-o.

⁵ A bhadi pi Kilisito moko. Ani to nani ndata na 'ngbé dimandø gba Ebhe bhú 'ndji e ngae makpe de. Engú bini, Ebhe aha nani pi ani ngae, Ebhe atsia apa pi ani me:

«Ngamũ-o, mũ ne Ndili gba ma,
naye pi naki inde-e, ma ne 'Dyi mũ.†»

⁶ Ani atsia apa di li bili koko me:

«Mũ ne dimandø gba ma dũdũma ne dũdũma,
maka Malekisedeke.†»

⁷ Nedhinga li Yesu adũ lie pĩla doto-o, ani adũ nayo Ebhe di ne nakikiliki lie pi ani ne nasũsula kpekpeke la di ne ngũla bhú djila e. Ani ayo Ebhe inde i ti da nani nakobho ani bhú kuo-o. Abhomũ-o, Ebhe atsia adje ani, anga ani a'o nani lie ne kuto kala Ebhe. ⁸ Abana ani adũ nani lie Ndili gba Ebhe-e, ani ambila lie ne namanga Ebhe bhú likabhu inde ani azũ e-o. ⁹ Pita ani andjia kulu gba e lie hana ndjindji kala Ebhe-e, ani atsia akolo kpongu na mukobho na dũdũma pi ndũ okpála hana inde ngamanga ani-o. ¹⁰ A moko, Ebhe a'o ani 'ngbé dimandø gba e maka Malekisedeke.

A ayo me yi bhele bhú nabhuka gba yi-o

¹¹ Ya ne engú bhelé napapa pindji 'ngú bhomũ-o. Engú bini, da nambamba tata-a kpekpeke, anga yi ti da nakpokpo kúkú má gala de. ¹² Yi adũ nako ne nedhinga bhelé ngũbula me yi kolo omũsuno. Engú bini, yi matá ne gumũ me u suno ongú na kalanũ na eli gba Ebhe-e pi yi ne toto. Yi nga bha ne gumũ nandji miliki bhú da nazũ ezũ na kpekpeke. ¹³ Padhá de, anga

† 5:5 5:5 Tsia bhú Ets. 2:7. † 5:6 5:6 Tsia bhú Ets. 110:4.

kpála bhende nga bha ngandji miliki-e ne ndili. Aní mbila nga nagbogbo bhṣu bádha 'ngú ne siti 'ngú de. ¹⁴ La-a, ezu bhe na kpekpeke-e pí obhelesi okpála. A ko okpála inde ambila lío ne nagbogbo bhṣu siti 'ngú di ne bádha 'ngú ka okulu inde u amene e-o.

6

¹ Kaka-a, ní kodho 'kpí lí nasuno bhende ati ne obhelesi okpála-o. Ní dji 'ngbu ní lí nasuno na lilita gba omakilisito. Ní a'ó matá 'dhu nasuno inde-e ne toto de: nadji bua o di ne na'o okulu inde ngato kpála bhú kuo, ² nasuno pindji obatisimo di ne na'o 'kpa o pí 'ndji kpála, nakpokpo 'ngú pindji nazuku ka okpála inde amu, di ne nakodho 'ngú na duduṃa. ³ A bhomu-o ongu inde a ayo me ní 'o e-o, i du me Ebhe nde akunda-o.

⁴⁻⁶ Padhá de, anga engú gba okpála bhende ngagie lío bhú siti 'ngú gba o-o, lele pí? U asia nani zi 'ke gba Ebhe-e asia. U ale bádha 'ngú inde lí Ebhe ngaha e pí omaha e pí 'mi o. U atsia asia di Bu Bhobua bhú dabilí bini ne okpála koko. U ambila ndjindji me eli gba Ebhe-e babadha. U ambila angu na doto inde ngago-o. Pipita-a, u atsia a'o ká nabhuka gba o-o! U tí da matá namene de me u dji bhobua o bhutsibhutsi na bhisi-e de. Padhá de, anga u ngagie matá Ndili gba Ebhe-e lí kulusi ne toto. U la dí ngaka kpadji pí okpála me u du nasobho ani.

⁷ Lí doto du nandji ngubha inde ngadhi pépé ndu nedhinga hana-a, lí i du la dí me a nde

ngagbe ezụ pi okpála inde alu edyi ango-o ndjindji-e, li Ebhe túko bisagu pí doto ango-o. ⁸ La-a, i dū me doto ango-o nde azu ulu na eti ne bhe na sisiti-e, tata dú tété de. Doto ango-o masakpe me Ebhe tū pɔdjo tété. Pipita-a, u tsia bú bhú djua.

⁹ Abana ya pa mo-o, ondaise ma na mukunda, ya ambila ndjindji me yi li bádha kpadji, kpadji na mukobho. ¹⁰ Ebhe ne kpála na ngbingbili . Aní 'íli 'to e li kulu gba yi-e de. Aní 'íli la di 'to e li mukunda yi asuno e pi aní li kulu inde yi amene e, inde la di yi matá ngamene e pi omakilisito koko de. ¹¹ Gumū gba ya-a me ndū yi hana bini ne bini, yi suno ngua mukunda bhomū-o nakolo makolo alí soso, ngubula me ndū 'ngú hana inde yi nde ne 'to yi 'to e-e, tsia mene lie hana. ¹² Yi andála de. Engú bini, yi kpata nganda okpála bhende ngabhuka ne kekele, inde la di ngasia ehe inde li Ebhe apa me ni ahá e-o.

Ní 'o 'to ní 'to ehe inde li Ebhe apa me ni ahá e pi ní-o

¹³ Li Ebhe apa nani lie pi Abalahama me ni ahá ehe pi aní-e, aní apa 'ngú ango-o ne natū silika ne 'lí e makpe. Aní amene mo-o, anga kpála koko inde ngebéngbé ane aní ade. ¹⁴ Aní apa nani me: «Ma atū silika me ma atúko bisagu pí mū, ma tsia méne me odi mū kolo bhelé.†»

¹⁵ Abalahama adjeke ne 'ndjá bua, aní atsia asia ehe inde li Ebhe apa nani me ni ahá e pi aní-o.

¹⁶ Li okpála dū natū silika-a, u tūtū ne 'lí okpála

† 6:14 6:14 Tsia bhú Dje. 22:16-17.

inde ane uo mane. La di-e, natu silika ngandjia kpekebhe sunda okpála. ¹⁷ Ebhe asuno bhomu mbámábá pi okpála inde ayo me u sia ehe inde ani apa me ni ahá e-e, a anéke belegu de bini. Kaka-a, ani atsia atu silika pí 'ngú ang-o.

¹⁸ A ne ongu bhisi inde u ti da nadji e de, a ko natu silika di ne ehe inde li Ebhe apa me ni ahá e-o. Bhú ongu bhisi ang-o, Ebhe ti da napa eu belegu de bini. Ngani okpála inde awo liní bhú Ebhe-e, ní alu kpekpeke, ní a'o la di 'to ní na paká paká 'to ehe inde ani apa me ni ahá e pi ní-o. ¹⁹ 'To ní inde ní nga'o e ang-o ngamene me ní lu kpekpeke maka kalase inde ahoholo zabu-o. 'To ní ang-o kuku, a la di kpekpeke. A ngamene me ní gulu 'ngbé pála bongo inde ngabuku tina 'ti na bubu na 'ngbé 'ti Ebhe gba omaYuda inde abhúla-o, amba ní kolo makolo bhú tina 'ti ang-o. ²⁰ Oo, Yesu ali nani pi ní kalanu, la di ngubula ní. Ani akolo 'ngbé dimandø gba Ebhe-e pi ní dudu ma ne dudu ma maka Malekisedeke.

7

Malekisedeke adu nani ne dimandø gba Ebhe

¹ Malekisedeke ang-o adu nani 'ngbé ngamá na Saleme, ani atsia adu di nani dimandø gba Ebhe Apí 'Kpí. Li Abalahama adu agie lie lie bhú egú inde ani agboko ongbengbe ongámási bhú e lie, Malekisedeke anu nakø lio ne ani, ani atsia atuko bisagu pí ani. ² Abalahama atsia aha bini bhú ká ndjikpa bhú ndu 'he hana inde ani agbulu e-e pi ani. Ta 'ili na Malekisedeke apa ngaiza kalanu me: «'Ngbé ngamá na ngbili 'ngú .» La

di-e, ani adu nani ngámá na Saleme, inde akunda napa me: «'Ngbé ngámá na guo 'ngú .» ³ U mbila 'dyi ani ne 'hi ani de. U mbila la di onguo ogbi ani de. U kpo belegu engú bini pindji ekpí u azu ani lie ne ekpí ani akpí lie de. Ani maka Ndili gba Ebhe, kulu gba ani na dimandø gba Ebhe-e dudu ma ne dudu ma.

⁴ Yi tsia nga maka li Malekisedeke nde lie ngebéngbé-o! Abalahama ogbi omaf salaele aha nani bini bhú ká ndjikpa na ndu 'he hana inde ani asia nani e bhú egú-o pi ani. ⁵ La-a, okpála na piga gba Levi-e, inde ne odimandø gba Ebhe-e, ne angu ngú nayo bini bhú ká ndjikpa na ndu 'he hana inde ka ongisi na Isalaele, maka li líli apa lie-o. A kunda napa me u ngayoyo li ondaise o makpe, inde la di ne odi Abalahama. ⁶ Malekisedeke du nani bhú piga gba Levi de. Engú bini, ani asia bini bhú ká ndjikpa sakpa Abalahama bhú ndu 'he hana inde ani agbulu e bhú 'gú-o. La di-e, Malekisedeke atuko bisagu pí Abalahama, kpála inde li Ebhe apa nani me ni ahá oehe pi e-o.

⁷ Kpekebhe belegu ade bini me kpála bhende ngatuko bisagu pi kpála-a ngebéngbé ane kpála bhende ngasisia-o. ⁸ Okpála inde na piga gba Levi-e, inde ngasia bini bhú ká ndjikpa-a, a ko okpála-kuti inde amú mamu. Engú bini, pi Malekisedeke inde u aha bini bhú ká ndjikpa pi e ne kpála inde i kpikpi de, maka li Bhuku gba Ebhe-e apa lie-o. ⁹ Ngú nabu tata-a, u ti da napa me, li Abalahama aha nani bini bhú ká ndjikpa na ohe gba e lie, Levi inde li odi e ngasia bini

bhú ká ndjikpa na ndu 'he hana-a, atsia aha di. ¹⁰ Padhá de, anga Levi inde u zu nga nani e de-e, adu bhú 'bu ogbi e Abalahama, nedhinga inde u akè lio lie ne Malekisedeke-o. Bhobhomu-o asuno me Malekisedeke ane Levi mane.

¹¹ Ebhe aha nani lílì pí omafsalaele me, u du nabhu odimandø gba ni-e bhú piga gba Levi. U adú odimandø gba Ebhe maka Alona. Engú bini, kulu na dimandø gba Ebhe bhú piga gba Levi-e ti nani da nabledhe 'bhø kulu gba Ebhe-e de. Padhá de, anga lí kulu gba uo-o tí nani da nabledhe 'bhø kulu gba Ebhe-e uu-o, u de du nani ne gumu dimandø koko maka Malekisedeke de. ¹² La di-e, lí u yipa dimandø gba Ebhe-e, a ayo bhadi me lílì-e yipa. ¹³ Padhá de, anga Ngámá gba ní inde u ngakpokpo ongú inde-e pindji e-e, naae bhú piga koko kpi. Bhú piga ang-o, kpála bini mene nga belegu kulu na dimandø gba Ebhe lí bilì u atsutsulu 'he lie pí Ebhe-e de. ¹⁴ Ní mbila ndjindji me Ngámá gba ní-e adu nani bhú piga gba Yuda. Piga ang-o, Moidje gama 'ngú tété de, nedhinga ani agama 'ngú lie pindji odimandø gba Ebhe-o.

Yesu ne dimandø gba Ebhe maka Malekisedeke

¹⁵ Engú inde ngasuno nayipa ka dimandø la matá mbám-bá-a ngae inde: dimandø koko akoto, ani maka Malekisedeke. ¹⁶ Ani kolo dimandø gba Ebhe lí lele lílì gba okpála-kuti de. Ani akolo mo-o bhú angu na mukobho inde i ndjia de. ¹⁷ A maka lí Bhuku gba Ebhe-e apa lí me:
«Mu ne dimandø gba ma duduma ne duduma, maka Malekisedeke.†»

† 7:17 7:17 Tsia bhú Ets. 110:4.

¹⁸ Kaka-a, u atsia a'e líli na kalanu-o, anga líli ango-o adu bhubhuku, tata tsia du la di tété de. ¹⁹ Padhá de, anga líli gba Moidje ti nani da namene de me okpála kolo ngbingbili kala Ebhe de. Engú bini, ní asia engú bini inde ane ne bádha naali, inde ní nga'o 'to ní 'to e-o. Padhá de, anga engú ango-o ngamene me ní dyudyo liní de Ebhe masikpe.

²⁰ La di-e, Ebhe atu nani silika. Engú bini, okpála koko akolo nani odimandø me u nde tu silika de. ²¹ La pi Yesu-o, Ebhe atu nani silika nedhinga li ani apa lie pi ani me:

«Ngámá atu silika-a, ani djí 'li e de:

«Mu ne dimandø gba ma Ebhe Ngámá, dudu ma ne dudu ma.†»

²² Kaka-a, Yesu di ne kpála inde ngamene me ní du bhú gandja na babadha naali.

²³ Engú koko inde kpi-e ngae inde: odimandø koko adu nani bhelé naali, anga kuo adu nani kpadji pi uo me u adú odimandø dudu ma de.

²⁴ Engú bini, Yesu bhú mukobho dudu ma ne dudu ma, kulu gba ani na dimandø-o ti da nandjia de. ²⁵ Kaka-a, ani ti da nakobho okpála inde ngadyudyo lio de Ebhe li kpadji gba ani-e ngubula dudu ma ne dudu ma. Padhá de, anga ani ndu 'kpí hana bhú mukobho ngú nayo Ebhe pi uo.

²⁶ Kaka-a, Yesu ne 'ngbé dimandø inde ati ne ní-o. Ani bubu, pulu 'ngú bhú ani ade, siti 'ngú la di bhú ani ade. Ani agbo bhusu e ne obhulu mugwe. Ebhe atsia a'e'e ani tsutsu abhúlá. ²⁷ Ani

† 7:21 7:21 Tsia bhú Ets. 110:4.

maka ongbengbe odimandø koko ade. Anì ne gumu natsulu 'he pi Ebhe ndu 'kpí hana ngaiza ngubula siti 'ngú gba e makpe, pípita ngubula bhende gba okpála koko ade. Anì amene nani bhutsibhutsi bini má kpíkili, li anì aha lie lie ngae makpe-o. ²⁸ Lili gba Moidje adu nani na'o maka ongbengbe odimandø li okpála-kuti inde i du ngbingbili hana ade-o. Engú bini silika li Ebhe atu e-e, líli-e atsia a'o maka 'ngbé dimandø Ndili inde adu ndjindji hana libhomu maka li Ebhe akunda lie, ngubula duduama ne duduama.

8

Yesu ne 'ngbé dimandø gba ní-e ngae

¹ Engú na ngbéngbé bhú ká ongú inde ní ngapa e ngae inde: a bhomu-o ngua 'ngbé dimandø gba Ebhe inde ka ní-o. Anì adu abhúlá li pápá na kokpa de kiti na ngámá gba Ebhe na angu na ngbéngbé-o. ² Anì ngamene kulu na 'ngbé dimandø gba e bhú tina 'ti na bubu, a akunda napa me bhú 'ti ngbangbali na kukulá. Ayiki ne Ngámá, ayiki ne kpála-kuti de.

³ U bhubhu ongbengbe odimandø gba Ebhe-e hana ngubula natsulu enu maka makiso pi Ebhe. Kaka-a, a ayo me adu di ka 'ngbé dimandø gba ní-e ne ehe natsutsulu maka makiso pi Ebhe. ⁴ I dú nani me anì dú píla doto-o, anì de ne dimandø gba Ebhe-e ade. Padhá de, anga a ne odimandø gba Ebhe koko inde ngatsulu ehe maka makiso pi Ebhe maka li líli gba omaYuda apa lie-o. ⁵ Kulu inde li odimandø ango-o ngamene e-e, a ko lele kulu ongú inde ngamene lie abhúlá-o. Engú

ango-o viti bini ne ehe inde li Ebhe apana nani e pi Moidje-o . Li Moidje adu akunda nayiki 'ti ngbangbali lie, Ebhe apa pi ani me: «Tsia ndjindji ngubula me mu mene ndu 'ngú hana li lele bhende ma asuno e pi mu apí 'ta-o.†»

⁶ Engú bini, mbia inde-e, Yesu asia kulu inde kpi, ane bhende gba odimandø koko gba Ebhe-e mane. A ko ludu sunda ní ne Ebhe bhú gandja na babadha naali. Gandja ango-o alu di pí oehe na babadha naali inde ní nga'o 'to ní 'to e-o.

Ebhe apa me ni akódho gandja na mbia ne okpála gba ni

⁷ I dú nani me gandja na kalanu-o mene me okpála kolo ngbingbili kala Ebhe-e, u de yipa ne koko de. ⁸ Engú bini, li Ebhe au lie me gandja na kalanu-o du ndjindji hana de-e, ani atsia ambembe bhú 'ndji okpála gba e me:

«Ngámá apa me: oekpí akólo makolo,
li 'kpí ma akódho gandja na mbia lie
bhú dabili bini ne piga gba Isalaele di ne
bhende gba Yuda-o.

⁹ A adú maka bhende ma akodho nani e ne onguo ogbi uo-o de,
li 'kpí inde ma agbe uo lie bhú doto na
Edjipito-o.

Bhú gandja ya akodho e ne uo-o, u kpata líli ango-o de.

Kaka-a, ma adji 'ngbu ma li uo, Ngámá apa mo-o.

¹⁰ Ngámá atsia apa matá me:

† 8:5 8:5 Tsia bhú Eki. 25:40.

a bhomu-o gandja inde ma akódho e ne ongisi na
Isalaele pita oekpí bhomu-o.

Ma ató olíli gba ma-a bhú imbilangu gba uo-
o.

Ma ayé olíli ango-o li bua uo.

Ma adú ne Ebhe gba uo, u tsia dú okpála gba
ma.

¹¹ Kpála bini bhú ká uo dú matá ne gumu nasuno
'ngú pi ndili na kuti gba e,

di ne pi ndai e de me ani mbila ma-a de-e de.

Padhá de, anga ndu okpála hana ambíla ma,

nayie li okpála na padhá nakolo makolo li
okpála na kukulu.

¹² Ma ambú li ndanda 'ngú gba uo-o.

Ma abhúndja matá osisiti 'ngú gba uo-o de.†»

¹³ Li nedhinga li Ebhe ngagama 'ngú lie pindji
gandja na mbia-a, ani a'o bhe na kalanu-o me
akolo didili. A na paká me, li ehe de akolo didili
akolo-o, i du la di me a nde akadha-a, ehe ango-o
masikpe de nangita.

9

Olíli na gandja na kalanu

¹ A adu nani bhú gandja na kalanu-o ne olíli
ngú nayo Ebhe. La di-e, bili nayo Ebhe atsia adu
di pila doto. ² U ayiki nani 'ti ngbangbali bini
ne tina 'ti bhúbhú bhisi. Bhú titina na kalanu-o,
u a'i e me dabili na bubu-o, u a'o misa u a'o'o
tala pí e bhúbhú. U atsia a'o di misa ne mapa
inde u aha e pi Ebhe-e bhúbhú. ³ Kele 'ngbé pála

† **8:12** 8:8-12 Tsia bhú Djlm. 31:31-34.

bongo-o , adu tina 'ti bhe u a'i e me bili na bubu naali-o.

⁴ Li bili ang-o, u a'o nani misa na olo inde u adu atsulu mangotsi pi e, di ne sanduku na gandja* inde u abuku nani kute e ne olo libhomu-o. Bhu sanduku ang-o, adu bhubhu ne lusa inde u amene e li olo, mana atsia adu bhubhu. Bhu sanduku ang-o, adu di bhubhu ne ndula gba Alona inde agbe nani felele, a la di-e opapala teme inde li u aye nani lili na gandja-a pi e-o. ⁵ Pi sanduku ang-o, u a'o nani okulu kelube. Okelube ang-o adu asuno me Ebhe li bili bhomu-o. Kulu zini na mbudha uo adu abuku bili inde li 'ngbe dimand gba Ebhe-e ahaha ngute maka makiso pi Ebhe lie ngu nambu li siti 'ngu gba okpala-o. La mbia inde-e, a ko nedhinga nagama 'ngu li 'ngu ang-o bini bini de.

⁶ U aleke nani bili bhu 'ti ngbangbali ang-o me, bhu tina 'ti na kalanu, odimand gba Ebhe-e du nali ndu 'kpi hana ngu namene kulu gba o-o. ⁷ La-a, bhu titina bhe na bhisi-e, a adu bha bini nali ne 'ngbe dimand gba Ebhe-e ngae kpi e kpi. Sunda kalanga bini-e, ani adu nali bhutsibhutsi bini. A ayo di nani me ani li bhu dabili bini ne ngute enu, inde ani adu aha e pi Ebhe ngabula siti 'ngu gba e, di ngabula siti 'ngu li okpala amene e me u nde mbila de-o. ⁸ Bu Bhobua asuno me kpadji na tina 'ti bhe u a'i e me bili na bubu naali bhulu nga nani lie de, i du me 'ti ngbangbali na kalanu-o nde ngabha u-o.

* **9:4** 9:4 Sanduku na gandja: A ko sanduku inde u abu nani opapala teme inde u aye ofli ndjikpa gba Ebhe-e bhu e-o.

9 'Ti ngbangbali ang-o ne kulu ongu inde ngamene lie bhú onedhinga inde-o. Bhobhomu-o asuno me oehe natsulu matsulu maka makiso pi Ebhe-e ti da navulu bhobua kpála inde ngamemene-e de. 10 Omakiso ang-o, a ko bha bini ongu nazu 'he, ne nandji 'he di ne ngangá mayo navulu lio ngu nakolo bubu kala Ebhe. Ndu olili bhomu-o hana nani ne bhe gba okpála-kuti, atsia adu la bhadi ngubula nedhinga bedi nakolo li nedhinga li Ebhe ayipa ndu 'ngu hana lie ndjindji-o.

Kilisito agbegbe ní bhú siti 'ngu gba ní-e ne ngute e makpe

11 Engu bini, Kilisito ago maka 'ngbé dimandø gba Ebhe ngubula naha obabadha 'ngu inde ngago-o. 'Ti ngbangbali inde ani amene kulu gba e bhú e ngbéngbé naali, a la di babadha naali ane bhende na kalanu-o mane. A yiki 'ti ngbangbali ang-o ne okpála-kuti de, a akunda napa me, a ko 'ti ngbangbali na doto inde-e de. 12 Kilisito ali nani bhutsibhutsi bini má kpikili li bili na bubu naali ang-o. Ani ha nani ngute meme de, ani ha la di ngute ndili bagala de. Engu bini, ani aha nani ngute e makpe. Kaka-a, ani atsia agbegbe ní bhú siti 'ngu gba ní-e duduama ne duduama.

13 Ngute meme, i du di-e ngute bhoko bagala di ne mbi bagala inde u atsutsulu e, u tsia bála e pi okpála bhende bubu kala Ebhe ade-e ti da namene me u kolo bubu kala ani li pápá na kute. 14 I nde lie mo-o, ngute Kilisito ane la matá ne angu! Ani aha lie pi Ebhe kabula Bu Bhobua na duduama maka makiso inde ndjindji libhomu.

Ngute ani avúlu bua nakpokpo kú 'ngú gba ní-e bhú ndu 'ngú hana inde ngato kpála bhú kuo-o, ngubula me ní mene kulu pi Ebhe inde bhú makobho-o.

Kilisito ne ludu sunda ní ne Ebhe bhú gandja na mbia

¹⁵ Kaka-a, Kilisito ne ludu sunda ní ne Ebhe bhú gandja na mbia, amba okpála inde li Ebhe a'i o-o, ti da nasia babadha 'ngú na duduma inde li Ebhe asuno nani e pi okpála gba e-o. U ti da nasisia anga Kilisito akpi ngubula nagbegbe uo bhú siti 'ngú inde u amene e-o. U amene nani siti 'ngú ang-o li nedhinga u adu lie bhú gandja na kalanu-o.

¹⁶ Ní mbila ndjindji me li kpála ziba me u gbogbo bhusu ohe gba ni-e pita nakpi ka ni-e, kala me u gbogbo bhusu ohe ang-o, a ayo ngaiza me u u mbámhá me kpála ang-o akpi.

¹⁷ Padhá de, anga i du me kpála inde aziba nagbogbo bhusu ohe gba e nde nga bha uu-o, tata li nagbogbo bhusu ohe inde ani aziba me u gbogbo bhusu e ade. Tata li nagbogbo bhusu ohe bha bini me kpála ang-o nde akpi. ¹⁸ Kaka-a, gandja na kalanu-o asia bha bini angu li ngute atuko lie-o.

¹⁹ Moidje atanga ngaiza nani olili kala ndu okpála hana maka u aye lie-o. Pipita-a, ani atsia aha ngute ndili bagala di ne ngute meme bhú dabili bini ne engu, ani ato ndjiga inde u agbite e ne mbe bongo bhú ngute ne engu-o. A adu

ndjiga ndula inde u a'i e me idjope.† Pipita-a, ani abobolo pí bhuku na líli-o, di ne pí ndu okpála hana. ²⁰ Ani atsia apa me: «A inde-e ngute na gandja li Ebhe apa me yi manga e-o.†» ²¹ Abhomu-o, Moidje abolo di ngute-e pí 'ti ngbangbali di ne pí ndu ohe hana inde u adhødhøgø Ebhe ne e-o. ²² Maka li líli apa lie, masikpe de ndu 'he hana kokolo bubu kala Ebhe bha ka ngute. La di-e, Ebhe mbumbu bha li siti 'ngú me ngute nde atuko bha ngae.

Kilisito aha lie ngae makpe maka makiso ngú na'e siti 'ngú gba ní-o

²³ Ma apa pi yi me ndu 'ngú hana inde na kukulu li Moidje asuno nani e pi okpála-a, a ko okulu okukulu 'ngú na abhúla. Kaka-a, a ayo la bhadi me ongu angoo kolo bubu kala Ebhe bhú ngute onu. Engú bini, ongu na kukulu na abhúla makpe ne gumu enu natsulu matsulu inde ane ne badha. ²⁴ Padha de, anga Kilisito li nani bhú 'ti ngbangbali inde li okpála amene e ne kpa oo de. 'Ti ngbangbali angoo ne kulu 'ti ngbangbali na kukulu-o. Ani ali abhúla makpe, li bili inde ani ngagama 'ngú lie mbia inde-e kala Ebhe ngubula ní-o.

²⁵ 'Ngbé dimandø gba Ebhe gba omaYuda lili nani li bili na bubu naali-e ndu kalanga hana bhú dabili bini ne ngute 'nu. Engú bini, Kilisito li nani ngú naha lie ngae makpe bhutsibhutsi

† 9:19 9:19 Idjope: A ko saka ondula na gba omaYuda. Epondje nani u ato e bhú kpongadha pandi inde u aha nani e pi Yesu me ani ndji-e, nedhinga ani adu lie li kulusi-e, u agbite nani li Idjope.

† 9:20 9:20 Tsia bhú Eki. 24:8.

bhelé de. ²⁶ I dú nani mo-o, ani de azu likabhu bhutsibhutsi, nayie maka li Ebhe abho nani doto lie-o. Engú bini, ani akoto bhutsibhutsi bini má kpikili li nedhinga na sokpí ngú na'e siti 'ngú gba ní li kpadji naha lie ngae makpe maka makiso pi Ebhe. ²⁷ Ndu okpála-kuti hana kpikpi bha bhutsibhutsi bini. Pipita-a, li Ebhe tsia kódho 'ngú gba uo-o. ²⁸ A bhadi moko, Kilisito aha lie maka makiso bhutsibhutsi bini, ngubula na'e siti 'ngú gba okpála bhelé. Ani akóto lie bhutsibhutsi na bhisi-e, a adú matá ngubula na'e siti 'ngú de. Engú bini, a adú ngubula me okpála inde ngadjeke ngago ka ani-e sia mukobho.

10

Makiso gba Yesu Kilisito ane ndu omakiso na kalan-o hana

¹ Lili gba Moidje ngasuno kukulu 'ngú hana má kpulukutu ade. A ko mangbo kulu ongu na babadha inde ngago-o. Lele pi li makiso inde li ngua e nde bha ndu 'kpí hana bini, inde u ngaha e ndu kalanga hana ti da lie namene me, okpála bhende ngadyudyo lio denge Ebhe-e kolo ndjindji kala ani-e? ² I dú me okpála inde ngaha ngua makiso bhomu-o pi Ebhe-e dú bubu kala ani-e, u de 'ó nabhundja siti 'ngú gba o-o. U tsia 'ó la di naha makiso ango-o. ³ Engú bini, naha makiso ngamene me okpála du nabhundja siti 'ngú gba o-o ndu kalanga hana. ⁴ Padhá de, anga ngute bhoko bagala ne ngute meme ti da na'e siti 'ngú belegu de bini.

⁵ Kaka-a, li Kilisito adu ago lie pila doto-o, ani apa pi Ebhe me:

«Ma kunda nani ehe natsulu matsulu,
i du di-e makiso de,

engú bini, mo oha kute mama
ngubula me ma mene kulu gba ma-o nedi.

⁶ Enu inde u atsulu e pí misa inde u atsutsulu 'he pí e,
di ne ehe natsulu matsulu koko inde
u aha e ngubula na'e siti 'ngú-o nga nani li
ma de.

⁷ Abhomu-o, ma atsia apa me:

<O Ebhe! Tsitsia,
ma ngago ngama makpe
ngú namene engú inde mo okunda e-o,
maka u aye engú gba ma-a lie bhú bhuku na líli-
o.†>»

⁸ Kilisito apa ngaiza pi Ebhe me: «Ma kunda nani ehe natsutsulu matsulu de, i du di-e makiso de. Enu u atsulu e pí misa inde u atsutsulu ehe pí e, di ehe koko inde u atsulu e ngú na'e siti 'ngú-o nga nani li ma de.» Engú bini, u haha makiso bhomu-o nakpata lele maka li líli apa lie ko. ⁹ Pipita-a, ani atsia apa me: «Ma ngago ngama makpe ngú namene engú inde mo okunda e-o.» Kilisito a'e omakiso na kalanu-o hana, ani atsia ayipa ne bhe gba e-o. ¹⁰ Yesu Kilisito amene makunda gba Ebhe-o. Ani atse kute e ngae makpe maka makiso bhutsibhutsi bini má kpikili, abhomu-o, ní atsia aze bhú siti 'ngú gba ní-o.

† **10:7** 10:5-7 Tsia bhú Ets. 40:7-9.

¹¹ Dimandɔ gba Ebhe-e bini ne bini lɔlɔ ndɔ 'kpí hana ngɔbula namene kulu gba e-o. Aní ngaha piko piko koli ngua omakiso bini. La-a, omakiso ang-o tí da na'e osisiti 'ngú belegu de bini. ¹² Engú bini, Kilisito aha koli makiso bini má kpíkili ngú osisiti 'ngú gba okpála dɔdɔma ne dɔdɔma. Pipita-a, aní atsia anu adu lí pá 'kpa na kokpa gba Ebhe. ¹³ Mbia inde-e, aní ngadjeke me Ebhe 'o obhulu yala gba ni-e dabili na sa 'dhu ni. ¹⁴ Abhomu-o, ne koli makiso bini inde aní aha e, aní adji okpála inde aní avulu o bhú siti 'ngú-o me, u kolo bubu kala Ebhe ngɔbula dɔdɔma ne dɔdɔma.

¹⁵ Bu Bhobua la bhadi ngapapa pí ya moko, aní apa ngaíza líe me:

¹⁶ «Yi tsia nga gandja inde ma akódho e ne uo pita oekpí bhomu-o,
Ngámá apa mo-o.
Ma ayé olíli gba ma-a lí bua uo,
ma tsia tó olíli ang-o bhú imbilangu gba uo-o. †»

¹⁷ Pipita-a, aní atsia apa matá me: «Ma abhúndja matá opupulu 'ngú di ne osisiti 'ngú gba uo-o de.†» ¹⁸ La-a, i du me Ebhe nde ambu lí siti 'ngú ambu-o, gumu naha makiso matá ngú na'e'e ade.

Ní a'ó ká nabhuka gba ní-e de

¹⁹ Kaka-a, ondaise ma, ní ambila ndjindji me ní alí lí bilí na bubu naali-e kabula ngute Yesu inde atuko-o. ²⁰ Aní abhulu kpadji na mbia pí ní, inde di na mukobho lí pápá na kpadji na

† **10:16** 10:16 Tsia bhú Djlm. 31:33. † **10:17** 10:17 Tsia bhú Djlm. 31:34.

'ngbé pála bongo na 'ngbé 'ti Ebhe gba omaYuda, akunda napa me, bhú kute e makpe. ²¹ A ka ní ne 'ngbé dimandø inde ngatsia 'kpí lí eti gba Ebhe-o. ²² Kaka-a, ní dyudyo liní de Ebhe ne bua ní bini di ne nabhuka hana. Padhá de, anga osisiti bua nakpokpo ku 'ngú adji lie akolo bubu kala Ebhe, kute ní atsia avulú lie bhú engu inde lí siti 'he nde bhú e ade. Ndu 'ngú bhomu-o hana amene lie bhú ngute Yesu.

²³ Ní lila engú inde ní nga'o 'to ní 'to e, inde ní nde ngakpokpo e kpekpeke-o. Padhá de, anga Ebhe améne engú inde aní apa me ní améne e mamene. ²⁴ Ní tsia 'kpí liní sunda ní ngú nadu ne mukunda na kukulu di ne namene obabadha kulu. ²⁵ Ní a'ó ka dadjua gba ni-e de maka lí okpála koko ambila lío lie ne namemene-o. A ayo mangbo me ní to masi bhú ní sunda ní. Padhá de, anga yi ngau me ekpí gba Ngámá-a akolo bha ndju masakpe.

²⁶ Padhá de, anga pita nambila kukulu 'ngú-o, i du me ní nde ngamene siti 'ngú bhú gandji-e, makiso inde u ti da naha e ngubula na'e osisiti 'ngú-o matá ade. ²⁷ Engú bini, ehe inde atigala pí ní-e, a ko bha nadjeye ne tsulu hana nakodho 'ngú gba Ebhe di ne dingidhi djua inde atsúlu obhulu yala gba ani-o. ²⁸ Ndu okpála hana inde adu agumu líli gba Moidje-e, u adu abhili uo. U du nadjeye ndjinga uo de, i du me okpála bhisi, i du di-e okpála bata nde apa me a ko kukulu 'ngú-o. ²⁹ La-a, kpála bhende ngau Ndili gba Ebhe-e bhú djila e padhá-a, aní asía ke 'ngú inde ane la matá mane. A mo-o adi? Padhá de, anga kpála ango-o

manga ngute na gandja na mbia inde avulu ani bhú siti 'ngú-o de. Anì ngasobho Bu Bhobua inde ngasuno bádha bhú 'bu gba Ebhe-e pì ní-o. ³⁰ A na paká me ní mbíla ndjindji me, a kò kpála inde apa me:

«Ma agíe siti 'ngú inde u amene e ngama.

Ma ahá pì kpála ne kpála ehe inde atì ne anì-o. †»

Anì atsia apa di me:

«Ngámá akódho 'ngú gba okpála gba e makodho.†»

³¹ A kò siti 'ngú na kuo kuo ngú nati bhú 'kpa Ebhe na mukobho.

³² Yi bhundja nga engú inde akolo nani li yi li nedhinga inde yi asia zi 'kpí gba Ebhe-e lie-o. Bha kolo pipita-a, yi azu likabhu naali. Engú bini, yi alu kpekpeke bhú nagu egú ango-o. ³³ U asobho okpála koko bhú ka yi, u atsia amene uo sisiti kala ndu okpála hana. Engú bini, okpála koko adu bedhe ngú nateteke okpála inde u adu ato mbolo lio bhomu-o. ³⁴ Yi azu likabhu bhú dabili bini ne okpála inde adu bhú tikpu-o. Li u agbulu ohe gba yi-e lie, yi aziba ne djali hana me u nu nedi. Padhá de, anga yi ambila ndjindji me a ka yi ne tia inde ndjindji naali, inde ngadu duduma ne duduma. ³⁵ Kaka-a, yi adu ne tsulu de. Padhá de, anga yi asia makalá na ngbéngbé kaka. ³⁶ A ayo me yi du ne kekele ngubula namene engú inde li Ebhe akunda e, di ne nasia ehe inde ani apa me ni ahá e-o. ³⁷ Padhá de, anga u aye bhú Bhuku gba Ebhe-e me:

† **10:30** 10:30 Tsia bhú Det. 32:35. † **10:30** 10:30 Tsia bhú Det. 32:36.

«A tigala nedhinga bedi, belegu bedi naali,
li kpála inde a ayo me ani go-o tsia gó.

Ani bhúe de.

³⁸ La-a, kpála inde ngbingbili bhú djila ma-a
tsia sía mukobho na duduma kabula nabhuka.

Engú bini, i du me ani nde agie lie ne sidi-e,
bua ma gá matá ne ani de.†»

³⁹ Ngani-e, ní bhú ká okpála bhende ngagie lio
ne sidi, inde di ngangita-a ade. Engú bini, ní
ne okpála bhende ngabhuka, inde di li kpadji na
mukobho-o.

11

*Ní le nadu ne ngua nabhuka gba onguo ogbi
ní-o*

¹ Na'o nabhuka gba o bhú Ebhe-e, a ko naziba
me ní asia ehe inde ní nde nga'o 'to ní 'to e asia.
A ko nadu ne nabhuka me ehe inde ní u e ne djila
ní de-e uu. ² Ebhe aziba nani okpála na kalanu-o
ka nabhuka gba o-o.

³ Ka nabhuka-a, ní ambila me Ebhe abho nani
doto ne 'li e. Abhomu-o, ohe inde ní ngau e ne
djila-a, abho lie li ohe inde ní u e ne djila de-o.

⁴ Ka nabhuka-a, Abele aha makiso na babadha
naali pi Ebhe, inde ane bhe gba Kaina mane.
Ka nabhuka ang-o, Ebhe au ani bhú djila e
ngbingbili. Padhá de, anga Ebhe ngae makpe
aziba makiso gba ani-o. Ka nabhuka gba Abele-e,
ani bha bini ngagama 'ngú, abana ani akpi lie-o.

⁵ Ka nabhuka-a, Enoka kpi nani-i de. Engú bini,
Ebhe aha ani abhúlá. Kpála bini ti da nani nau

† **10:38** 10:37-38 Tsia bhú Abk. 2:3-4.

ani de, anga Ebhe aha nani ani ngú na'o ani de e. Bhuku gba Ebhe-e apa me, kala me Ebhe ha ani abhúlá-a, ani amene nani engú inde anga li Ebhe. ⁶ La-a, i dɔ me nabhuka nde bhú kpála ade-e, ani ti da namene engú inde anga li Ebhe-e de. Padhá de, anga kpála inde ngadyudyo lie de Ebhe-e, a ayo me ani bhuka me: Ebhe uu, ani la di ngaha makalá pi okpála inde ngagili ani-o.

⁷ Ka nabhuka-a, Nɔa adje engú inde li Ebhe apa nani e pi ani pindji ongú inde agó, inde u u nga nani e de. Ani au me Ebhe pa eu de, ani atsia abho 'ngbé zabɔ inde ani akobho piga gba e bhú e-o. Namene ka ani mo-o, ani a'o mangimbo pí 'ndji okpála na píla doto. Ka nabhuka gba ani-e, Ebhe atsia au ani bhú djila e me a ko kpála na ngbingbili.

⁸ Ka nabhuka-a, Abalahama amene líli gba Ebhe li nedhinga inde ani a'i nani ani lie-o. Ani anɔ bhú doto inde li Ebhe apa nani lie me ni ahá e pi ani, amba akolo naani-o. Ani ayie bhú doto gba e padhá me ani nde mbila de me, ni adji bhú doto bhedho-ie de. ⁹ Ka nabhuka-a, ani anɔ adɔ maka gandji kpála bhú doto inde li Ebhe apa nani me ni ahá e pi ani-o. Ani adɔ nadɔ bhú 'ti ngbangbali, Isaka ne Yakobho atsia adɔ di nadɔ bhú 'ti ngbangbali. A bhomɔ-o okpála inde li Ebhe apa di nani pi o me ni ahá di doto ango-o pi o-o. ¹⁰ Padhá de, anga Abalahama adɔ nadjeke gɔdhɔ inde li 'dhɔ e alɔ kpekpeke. Ebhe amene lele maka li gɔdhɔ ango-o adú lie ngae, ani atsia ayiki bhadi ngae.

¹¹ Ka nabhuka-a, Abalahama asia nani angu

ngubula nazu ndili bhú nedhinga ani akolo lie ne kalanga bhelé, belegu li Sala adu lie ne i zu de-o. Ani adu ne nabhuka me engú li Ebhe apa me ni améne e-e, ani améne mamene. ¹² Kaka-a, koli ogbi ní bini Abalahama, inde adu de kuo masakpe-e, azu opiga bhelé. Ongisi inde li opiga ango-o azu o-o bhelé maka ikupala inde abhúlá. Uo bhelé di maka sike inde lingo 'ngbé 'ngu, inde li kpála ti da natanga e de.

¹³ Ndu okpála bhomu-o hana amu bhú nabhuka me, u nde sia oehe inde li Ebhe apa nani me ni ahá e pi uo-o de. Engú bini, u au oehe ango-o tsutsu, u atsia akpi djali. Abhomu-o, u atsia ambila ma kpulukutu me o ne ogomago, o la di ne okpála na dhuku píla doto ei. ¹⁴ Okpála inde ngapa ngua engú bhomu-o ngasuno mbámbá me o ngagili doto gba o makpe. ¹⁵ I dú me u du nakina doto inde u aze nani bhú e-e, u de agie lio bhú doto ango-o agie. ¹⁶ A na paká me, u adu ne gumu doto inde babadha naali. A akunda napa me doto inde abhúlá ko. Kaka-a, Ebhe ne numu ade me, u 'i ni me ni ne Ebhe gba uo-o. Padhá de, anga ani aleke gudhu bini pi uo.

¹⁷ Ka nabhuka-a, Abalahama aha Isaka maka makiso, li Ebhe ale ani lie-o. Abalahama li Ebhe apa nani me ni ahá 'he pi e-e, adu bedhe ngú naha koli ndili gba e bini-e maka makiso. ¹⁸ Ebhe apa nani pi ani me: «Li kpadji gba Isaka-a, mo osia opiga inde ma apa nani me ma ahá o pi mu-o.» ¹⁹ Engú bini, Abalahama adu abhundja me Ebhe ne angu nazuku Isaka. Kaka-a, Ebhe

† 11:18 11:18 Tsia bhú Dje. 21:12.

atsia agie ndili gba ani-e pi ani maka kpála inde u azuku e me ani nde akpi.

²⁰ Ka nabhuka-a, Isaka atuko bisagu pi ongisi gba e bhisi-o, Yakobho ne Esau, natsia lele ongú inde abháka uo sidi-o.

²¹ Ka nabhuka-a, Yakobho atuko bisagu pi ongisi bhisi gba Djodjefu-o , kala me ani kpi. Ani ateke lie li duku gba e, ani atsia adhogø Ebhe.

²² Ka nabhuka-a, Djodjefu apa li ani akolo lie masakpe de nakpi ka e me, omafalaale azé bhú Edjipeto maze. Ani atsia asuno engú inde a ayo me u mene e ne biki ni-o.

²³ Ka nabhuka-a, li u azu Moidje lie, okpála inde azu ani-e awo ndje ani ngubula epe bata. U au nani me ani babadha naali, u tsia dje tsulu ka líli gba 'ngbé ngámá-a de.

²⁴ Ka nabhuka-a, li Moidje abhele lie-e, ani ayala me okpála 'i ni me ndili gba ndili na øø gba Falao. ²⁵ Ani aziba nazu likabhu bhú dabili bini ne piga gba Ebhe-o. Ani atsia ayala nakpi djali inde ngubula nedhinga bedi-e bhú siti 'ngú.

²⁶ Padhá de, anga ani adu abhundja me li kpála zu likabhu kabula Masiya-a , bhobhomu-o pi ani ne tia na ngbéngbé ane bhende na Edjipeto mane. Kaka-a, ani a'o nani djila e li makalá inde ani asia e bhú oekpi inde ngago-o.

²⁷ Ka nabhuka-a, Moidje ayie nani bhú Edjipeto me ani nde kpe ke 'ngú gba 'ngbé ngámá-a de. Ani atsia alu kpekpeke mugito me ani ngau Ebhe inde u uu e de-o. ²⁸ Ka nabhuka-a, Moidje aha nani líli me u leke anokomia na Pasika . Ani atsia aha líli me u pulu ngute li obhe bhoti,

amba andjelu na kuo abhíli ongisi na kalanu gba omafosalaele de.

²⁹ Ka nabhuka-a, omafosalaele agulu nani 'ngbé 'ngu na Mbembe-e mugito me u ngadholo pí doto inde a'ulu má kekele! Engú bini, li omaEdjipeto ale di lie me ogulu 'ngu-o maka uo-o, engu-o atsia abuka uo. ³⁰ Ka nabhuka gba omafosalaele, aga inde asa nani gudhu na Djeliko-o agumu pita nadjí ngongo ngubula 'kpí mananika. ³¹ Ka nabhuka-a, Lahaba, eò na zabhe-e akobho nani. Ani kpi bhú dabili bini ne okpála inde adu agu Ebhe-e de. Padhá de, anga ani asia nani omafosalaele, inde u atima nani o ngú natsia lele gudhu-o ne guo 'ngú .

³² Ma ti da napa matá pí? Nedhinga ka ma ade ngú nakpokpo 'ngú gba Djedeo, gba Balaka, gba Samisona, gba Djefete, gba Davidi, gba Samuele, di ne bhe gba opolofeta-o . ³³ Ka nabhuka-a, u agboko ongbengbe ongámási na okuti bhelé bhú 'gú. U amene ongú inde adu ngbingbili, u asia 'he inde li Ebhe apa nani me ni ahá e pí uo-o, u atsia agbite 'bhò okingbi. ³⁴ U abulu odjua inde adu nade má ka ka ka! U akobho bhú nakpi sakpa mbotia. U adu bhubhuku, la-a, u atsia akolo kpekpeke. U adu kpekpeke bhú egú, u atsia aha angu osudha na gandji gandji. ³⁵ Ka nabhuka-a, olisi au matá okpála gba o inde amu-o. Padhá de, anga okpála ang-o azuku.

U ato mbolo li okoko nakolo masikpe de nakpi. U ayala me u gbegbe o sakpa okpála adu ato mbolo li o-o. U amene mo-o ngubula me o zuku ngú nasia mukobho na ndjindji naali. ³⁶ U amu

okoko, u atsia abhi di uo ne fimbo. U agbigbite okoko ne gbɔndjili, u atsia amba di uo bhú tikpɔ. ³⁷ U abhili okoko ne teme. U akokodho bhɔsu okoko bhisi ne sii. U atsia abhili okoko ne mbotia. Okoko adu anu ne ndu bili hana me u nde ato ko kandelo, i du di-e ko meme. U adu obhulu ndibhili. U adu nato mbolo li uo, u atsia adu namene uo kpekpeke. ³⁸ U ti nani da nadu pila doto inde-e de. U adu nadjakadha abhu 'gu, di ne apí oeta. U adu nadu bhú oedú di ne bhú ogudho teme.

³⁹ Ebhe aziba nani ndu okpála bhomu-o hana ka nabhuka gba o-o. La-a, u sia ehe inde li Ebhe apa nani me ni ahá e pi u-o de. ⁴⁰ Padhá de, anga Ebhe aleke nani ehe na babadha naali pi ní. Ani kunda nani de me u kolo ndjindji hana mandí ní-e de.

12

Yi lu kpekpeke bhú olikabhu inde yi ngazu e-o

¹ Pi ní-e, ndu ndindi okpála bhomu-o hana inde abhuka nani Ebhe-e, asa dengo ní ngbalina u ngau 'ngú inde ní ngamene e ne djila o. Kaka-a, ní gbe liní li ongu bhende ngagbigbite ní me ní adhuku ndjindji de-e magbe. A ane la mane pi siti 'ngú bhende ní ngali bhú e má gala gala-o! Holo inde li Ebhe apa me ní gu e-e, ní gu akólo makolo ali soso. ² Ní banga djila ní li Yesu inde li nabhuka gba ní-e ala pi e, nayie li lilita akólo makolo ali soso-o. Ani aziba nakpi li kulusi. Nakpi li kulusi-e, a ko nakpi na numu. Engú bini, ani dje numu tété de. Padhá de, anga ani adu nau

djali inde ani asía e-o. Mbia inde-e, ani adu li pá 'kpa na kokpa denko kiti na ngámá gba Ebhe-o.

³ Yi bhundja nga Yesu maka ani akibila yala inde li okpála namene siti 'ngú-o adu nayala ani ne e-o. Kaka-a, yi a'ó de me ndala ha angu yi-e de. ⁴ Padhá de, anga bhú gbele inde yi ngagu e ne siti 'ngú-o, yi gu nga nakolo bhú nakpi ka yi-e de. ⁵ 'To yi a'ili li lili inde li Ebhe aha e pi yi maka ongisi gba e-e a'ili? Lili ango-o me:

«Ndia ma, i du me Ngámá nde ngali mu-o,
mo obóyo de.

I du me ani nde ngambembe bhú 'ndji mu-o,
bua mu abí la di ndala de.

⁶ Padhá de, anga Ngámá ngali
kpála inde ani akunda e-o.

Ani ngabhi kpála inde ani ambila
me a ko ndili gba ni-o.†»

⁷ Kaka-a, yi kibila okpekpeke da 'ngú inde li Ebhe ngali yi ne e-o. Ani ngamene yi maka ongisi gba e. A ko ndili bhedho li 'dyi e lili e de-e? ⁸ I du me Ebhe nde li yi maka ndu ongisi koko gba e hana de-e, a akunda napa me yi ne kukulu ongisi gba ani-e ade. Yi ne ongisi inde u mbila 'dyi o de. ⁹ A li ní píla doto inde-e ne odyidi. U adu nani nali ní. Ní atsia adu di namanga uo. A ane la matá mane me ní manga 'Dyi ní inde abhúlá, ngubula me ní sia mukobho. ¹⁰ Odyi ní adu nali ní ngubula nedhinga bedi, maka u adu abhubhundja lie-o. Engú bini, Ebhe ngali ní ngubula bádha 'ngú gba ní-o. Ani akunda me ní du bubu maka ni. ¹¹ Nedhinga u ngali ní lie

† 12:6 12:5-6 Tsia bhú Gbt. 3:11-12.

mbia inde-e, a ngau lie maka u de ngaha pi ní likabhu, a ha djali pi ní de. La-a, pipita-a, okpála inde akodho 'kpí li ngua kpadji bhomu-o ngasia nguwa na guo 'ngú inde akpøtsø lie ne mukobho na ngbingbili-o.

¹² Kaka-a, yi 'e 'kpa yi inde andala-a ne bhúlá. Yi mene la di me 'dhu yi inde andala-a, a kolo kpekpeke! ¹³ Yi dhuku li okpadji inde ngbingbili, amba 'dhu kpála bhende ndjindji ade-e agúmú de. Aní kobho mangbo makobho.†

Yi dũ nagbo 'dje yi ndũ 'kpí hana li Ebhe

¹⁴ Yi gili nadu ne guo 'ngú ne ndu okpála hana. Yi dũ la di bubu. Padhá de, anga li kpála dũ bubu de-e, aní ú Ngámá de. ¹⁵ Yi lila liyi me kpála bini ayíe sa bádha bhú 'bu gba Ebhe-e de. Kpála bini akólo la di bhú ká yi maka ndula inde susu-o de. Ndula ango-o akø lie, a asiti mukobho gba okpála bhelé ne songø inde bhúbhú-o. ¹⁶ Kpála bini bhú ká yi adú nakunda olisi, i dũ di-e obhosi ngangá de. Kpála bini bhú ká yi aú oehe gba Ebhe-e bhú djila e padhá de, maka Esau. Aní atsindji nani nadu ka e ndili na kalanu ngubula koli sani 'zu bini. ¹⁷ Yi ambila ndjindji me sidi-e, aní adu ne gumu me 'dyi ni tuko bisagu pí ni. Engú bini, 'dyi aní abebe aní. Padhá de, anga abana nani aní ale nadji engú inde aní amene e lie ne naku 'gbá-a, aní sia kpadji de.

Nau inde i ti da nadyiki de

† **12:13** 12:13 Tsia bhú fsa. 35:3; di ne bhú Gbt. 4:26.

18 Yi kolo nga denngo eta bini de inde u ti da nabu 'kpa lie maka eta na Sinai, inde adu nani ne dingidhi djua-o. A adu ne biti, di ne anvi na kpekpeke naali. 19 Eta ango-o adu di ne tolo toti, di ne tolo nagama 'ngú. Li omaɪsalaele adje eli bhomu-o lie, u ayo me Ebhe agáma matá engú koko pí bhobhomu-o de. 20 U ti nani da nakibila líli inde-e de. Líli ango-o me: «Kpála inde abú 'kpa e li kute eta-a, abana i du di-e enu-o, u abhólo ani ne teme.†» 21 Engú inde u adu nau e adu na tsulu tsulu. Belegu Moidje atsia apa kaka me: «Ma ngadje tsulu naali, ma la di ngaguku maguku.†»

22 Engú bini, yi akolo denngo eta na Siona , denngo gudhu gba Ebhe na mukobho-o. A ko Yelusalema na abhúlá bhú dabili bini ne oandjelu gba e inde ketè ne ketè apo bhúla o bhú anokomia-o. 23 Yi akolo denngo ongisi na gigena inde apo bhúla o, inde u aye 'li o abhúlá-o. Yi akolo denngo Ebhe, kpála nakodho 'ngú gba ndu okpála hana-o. Yi akolo denngo okpála inde ngbingbili, li Ebhe amene me u kolo ndjindji hana kala ni-o. 24 Yi akolo denngo Yesu, kpála inde ne ludu sunda ní ne Ebhe bhú gandja na mbia inde li Ebhe akodho e ne ní-o. Yi akolo denngo ngute ani inde atuko, inde ngaha bádha 'ngú pí ní inde ane bhe gba Abele mane-o.

25 Yi lila liyi! Yi ayála nadje kpála inde ngagama 'ngú pí yi-e de. Padhá de, anga okpála inde ayala nani nadje kpála inde adu naha líli pí

† 12:20 12:20 Tsia bhú Eki. 19:12, 13. † 12:21 12:21 Tsia bhú Det. 9:19.

o p̄la doto-o, neke nasia ke 'ngú de. A adú bhadi p̄ ní moko. A ne la matá mane, i d̄u me ní nde ayala nadge kpála inde ngagama 'ngú p̄ ní nayie abhúlá-o. ²⁶ 'Li ani adyíki nani doto. Engú bini, mbia inde-e, ani apa p̄ ní me: «Ma adyíki matá doto bh̄tsibh̄tsi bini. A dú bha bini doto de, ma adyíki di ne abhúlá hana.†» ²⁷ Eli inde me «matá bh̄tsibh̄tsi bini», akunda napa me oehe inde u abho e mabho-o adyíki, i tsia ngíta, amba ehe bhende i ti da nadyiki de-e tígala bha ngae.

²⁸ Ní ngasia nau inde i ti da nadyiki de. Kaka-a, a ayo me ní gie heni p̄ Ebhe. Ní mene la di p̄ ani kulu inde anga li ani ne tsul̄u hana di ne namanga ani. ²⁹ Padhá de, anga Ebhe gba ní-e, a ko djua inde ngade made.†

13

Yi mene engú inde nganga li Ebhe

¹ Mukunda inde s̄nda yi-e nu bha ne kalan̄u maka ondaise . ² 'To yi a'íli nasia ogomago de. Padhá de, anga bhú namene mo-o, okpála koko asia nani oandjelu me u nde mbila de. ³ Yi bhundja okpála bhende bhú tikp̄u-o m̄gito me, yi ne uo bhú tikp̄u bhú dabili bini. Yi bhundja okpála bhende u ngato mbolo lio-o, m̄gito me u ngato mbolo ang-o li yi.

⁴ A ayo me nd̄u okpála hana manga k̄va mamanga. A ayo me bhoko lila k̄te e p̄ wala e, amba ēl̄e lila di k̄te e p̄ 'ko e. Padhá de, anga Ebhe akódho 'ngú gba okpála inde ngakunda

† **12:26** 12:26 Tsia bhú Adj. 2:6. † **12:29** 12:29 Tsia bhú Det. 4:24.

olisi, i du di-e obhosi ngangá-a makodho. Ani akódho di engú gba okpála inde ngakúnda olisi di ne obhosi ngangá, a la di-e okpála inde ngakúnda olisi, i du di-e obhosi koko.

⁵ Gumu tia ahá angu yi bhú mukobho gba yi-e de. Yi kpi djali li ehe bhende ka yi-o. Padhá de, anga Ebhe apa me:

«Ma 'ó ka mu de,
ma bála 'kpa li mu
belegu de bini.†»

⁶ Kaka-a, ní ti da napa ne nabhuka hana me:

«Ngámá ne kpála inde ngateteke ma,
ma djé tsulu li 'ngú bini de.

Okpála ti da namene ngú ma
mangua 'ngú dho?†»

⁷ Yi bhundja nga okpála inde adu nani pí 'ndji yi kalanu-o, inde akpokpo eli gba Ebhe-e pí yi-o. Yi bhundja nga lele maka u akpata nani Ebhe lie, di ne maka u amu lie-o. Yi bhuka maka u abhuka nani lie ko. ⁸ Yesu Kilisito yiyipa de, lili, naki, duduuma ne duduuma. ⁹ Yi a'ó de me nasuno na gandji gandji 'e yi li kpadji-e de. A ndjindji me bua ní sia angu ka bádha bhú 'bu gba Ebhe , a alú pí olíli inde atsia ezu-o de. Padhá de, anga okpála bhende ngamene ngua olíli bhomu-o sía bádha 'ngú tété belegu de bini.

¹⁰ Odimandø gba Ebhe inde ngamene kulu bhú 'ti ngbangbali-e ti nani da nazu enu inde u atsutsulu e pí misa gba ní natsulu enu-o *

† **13:5** 13:5 Tsia bhú Det. 31:6, 8. † **13:6** 13:6 Tsia bhú Ets. 118:6. * **13:10** 13:10 Enu inde u atsulu e pí misa si-e, a ko makiso inde u apa 'ngú e bhú olukuluku 15-16.

de. ¹¹ 'Ngbé dimandè gba Ebhe nganụ ne ngute onụ li bìli na bubu naali, ngubula nahaha maka makiso ngú na'e siti 'ngú. Engú bini, u tsutsulu kuo onụ ang-o li ngongo, a adudu bhú ká okpála de. ¹² Kaka-a, Yesu akpi di lingo gudhu na Yelusalema ngubula na'e siti 'ngú gba okpála ne ngute e makpe. ¹³ A ayo me ní nụ kò liní ne aní alí ngongo, ní kibila ngua pádha inde u apadha aní ne e-o. ¹⁴ Padhá de, anga píla doto ei-e, gudhu inde ní ngadu bhú e duduama ne duduama ade. Engú bini, ní mangbo ngagili gudhu inde adú galikpe ko. ¹⁵ La li kpadji gba Yesu-o, ní dhogè Ebhe ndu nedhinga hana maka makiso, a akunda napa me, ní dhogè 'li aní ne 'bhè ní. ¹⁶ 'To yi a'íli li namene bádha 'ngú, di ne nateteke liyi sùnda yi de. Padhá de, anga ngua makiso bhomu-o nganga li Ebhe ngae.

¹⁷ Yi manga okpála inde pí 'ndji yi-e mamanga. Yi mene la di líli gba uo-o. Padhá de, anga u ngatsia 'kpí li yi ndu nedhinga hana ne nambila ndjindji me ekpí bini, o kpókpo kú kulu inde o amene e kala Ebhe. Yi 'o me u mene kulu gba o-o ne djali hana. U améne ne nalopolo lio de, anga u mene ne nalopolo lio-o, bhobhomu-o téteke yi de.

¹⁸ Yi yo Ebhe pi ya. Ya ambila me bua nakpokpo kú 'ngú gba ya-a ndjindji. Padhá de, anga ya ngagili ndu 'kpí hana namene engú inde li lelele. ¹⁹ Ma ngayo ka yi ne kekele me yi yo Ebhe ngú ma, amba aní bhulu kpadji me ma gie lima de yi má gala!

²⁰ Ebhe inde li guo 'ngú ngayie ka e,

azuku Ngámá gba ní Yesu bhú ká okpála inde amu-o.

Ani akolo 'ngbé málila gba okandøø ne ngute e i nde ani aha e maka makiso.

Ani amene me gandja na dũdũma-a lu pí ngute ango-o.

²¹ A ayo me Ebhe ango-o mene me yi kolo ne angu ngú namene 'ngú inde ndjindji ngubula namene mukũnda gba ani-o.

A ayo me Ebhe 'o bhú ní engú inde ndjindji kala e li pápá gba Yesu Kilisito.

A ayo me u dhøøø ani dũdũma ne dũdũma.

A adũ moko!

Engú na soso

²² Ondaise ma, ma ngayo ka yi me yi dje eli inde ma ngato masi bhú yi ne e bhomu-o ne 'ndjá bua. La di-e, balua ma aye e pí yi inde-e ndjándjá ade. ²³ Ma akũnda napa pí yi me u atse 'kpa li ndai ní Timoté atse. I dũ me ani nde akolo má gala-a, ya anú natsia yi bhú dabili bini ne ani.

²⁴ Yi yi ndũ okpála hana inde pí 'ndji yi-e mayi. Yi yi la di ndũ okpála gba Ebhe-e hana mayi. Ondaise ní na Itali yi yi mayi. ²⁵ A ayo me bádha bhú 'bu gba Ebhe-e dũ bhú dabili bini ne ndũ yi hana.

Gandja na Mbia
Mayogo: Gandja na Mbia (New Testament)

copyright © 2020 Wycliffe Bible Translators, Inc.

Language: (Mayogo)

Contributor: Wycliffe Bible Translators, Inc.

All rights reserved.

2020-11-18

PDF generated using Haiola and XeLaTeX on 21 Feb 2024 from source
files dated 29 Jan 2022

6b4904fb-f8ce-5931-8218-7cee8914232c